

2 Korin

Naoa itəm tatol kəiu lan itəm Pol təməte tuwin kəm
iəfak min ikin Korin

Nəghatən əkuəkir rəha naoa u 2 Korin

?Pah təməte naoa u? **Aposol Pol** təməte naoa u.

?Təməte tatuwin kəm pah? Təməte tatuwin kəm
niməfak rəha Korin, ne iəfak min rəha profens Akaea.

?Nəmegəhən tahro nulan nian təməte? **Pol** tinəməte
rəkis naoa kisil mahl-ipən kəm niməfak rəha Korin. Inu
naoa itəm tatol kuwit lan. Məto naoa itəm tatol kitiəh,
ne naoa itəm tatol kisil, ilau kəmiakə. Naoa itəm tatol
kəiu, inu 1 Korin, kən e naoa u in təməghat əskasik kəm
ilat məmə okotəg-ətuatip-in nolən rat min rəhalat, kən in
təməgətun min ilat e natimnat pisin min neen. Ilat tepət
e niməfak kotətəu-pən nətəligən rəha Pol itəm təməte e
naoa 1 Korin. Məto neen əh-ikin, ilat koatən məmə Pol
in sənəmə etəm-iasol, kən təsətuatipən məmə in otəghat
min nəhlan. Kən ilat koatən məmə in tatol wək rəhan o
nosən əm mənī.

?Təməte naoa u o naka? **Pol in** təməte naoa u
matəgətun məmə in aposol kit, kən Uhgın in təmos-ipən
wək u kəm in, kən tətəuatip əm məmə in otəghat nəhlan
kəm ilat. Kən in tolkeike məmə otən-iəhau nəgətun
eiueiuə min itəm koatatig Korin.

Pol təmən təwir kəm ilat

¹ Io Pol, itəm Uhgın təmitəpun e nəwian məmə io aposol
rəha Kristo Iesu, iatəte naoa u itimlau piətət Timoti. Naoa
u tatimnə kəm itəmat, niməfak rəha Uhgın əpəh Korin,
ne iəfak min ilat rafin əpəh ikin Akaea. ² Pəs Uhgın Tata
rəhatat ne Iəməmə Iesu Kristo, okuawte-in nəwirən ne
nəməlinuən kəm itəmat.

Uhgin itəm tatol kepin netənim

³ Pəs kotənwiwi Uhgin, u in Uhgin ne Tata rəha ləramərə rəhatat Iesu Kristo. In Tata itəm in nəukətin nasəkitunən, kən in Uhgin itəm nol kepinən rafin tatisipən ron. ⁴ In tatol kepin kitat e nəratən rafin rəhatat məmə kitat kotitun nol kepinən netənim e nəratən pisin pisin min. Kən kitat kotol kepin ilat e nolən rəha nol kepinən itəm Uhgin təmol kəm kitat. ⁵ Tahmen əm e nahməən itəm Kristo təmos, təmuwa min e nəmegəhən rəhatat. Kən e nolən kitiəh əm, Kristo in suatip məmə nol kepinən təmuwa pik e nəmegəhən rəhatat, kən roiu nol kepinən rəhatat tatuwin min o netənim pisin pisin min. ⁶ Okəmə itimat ekoatəto nahməən, nahməən əh tatuwa otimat nian ekoatən-iarəp namnusən təwir, kən namnusən təwir əh otol kepin itəmat mosmegəh itəmat. Okəmə Uhgin təmol kepin itimat, tatol məmə itimat ekotitun nol kepinən itəmat. Kən noan nol kepinən əh, tatoe-in e nəmegəhən rəhatəmat, kən nian nəkotatig e nahməən kitiəh əm itəm kitat kotatig lan, tətasiu etəmat məmə onəkotətul əskasik matuwın matuwın. ⁷ Itimat emotələhəu-pən əskasik rəhatimat nətəligən o Uhgin otəmat məmə onəkotətul əskasik. Tol nəhlan məto-inu kitat rafin koatatig e natigən kitiəh əm məmə, itəmat nakoatəto nahməən itəm ekoatatig lan, kən tahmenahmen əm məmə nakotos nol kepinən kitiəh əm rəha Uhgin itəm emotos.

⁸ Piak min ne winik min, ekotolkeike məmə nəkotitun wir nian əskasik min itəm emotatig lan e profens ikın Esia. Nəratən asol min kəmotu itimat, taprəkis-in nəsanənən rəhatimat, təmol nikitimat təht məmə okəm-naka ekotimis. ⁹ Nipahrienən, itimat emotəto məmə kinegəhan-in rəkis itimat məmə ekotimis. Məto nian

askasik min əh kəmotuwa məmə esotagileən etimat, məto ekotagile e Uhgın itəm tatol etəm təminis təmegəh min. ¹⁰In təmosmegəh itimat e nəratən asol əh itəm təmatuwın o nımisən, kən in otosmegəh itimat e nəratən itəm otəpanuwa. Emotələhəu-pən askasik rəhatimat nətəligən lan məmə in otosmegəh min itimat. ¹¹Kən in otol nəhlan nian nakotəfak otimat məmə, netənim tepət okotənwiwi Uhgın o natimnat wir itəm in otol kəm itimat məto-inu netənim tepət kəmotəfak otimat.

Pol təməuhlin rəhan nətəligən o rəhan naliwəkən

¹²Roiu ekən nəghatən u məsaulisən məmə, e nətəligən rəhatimat, nikitimat təht məmə esotolən nat kit tərət e nolən rəhatimat. E nolən min rafin itəm emotol, itimat emotətəu-pən suatip itəm Uhgın təmitəpun məmə emotəghat ətuatip əm moatən əhag-əhag nəghatən. Emotol nolən əh kəm netəm əpnarın əm rəha nətueintən, kən motol taprəkis kəm itəmat. Esotəghatən e nitunən əm rəhatimat rəha nətueintən, məto emotagile əm e nəwirən rəha Uhgın. ¹³⁻¹⁴Iatən nəhlan məto-inu, esotətəən nəghatən kit itəm tiəkis otəmat o nafinən, o nitunən nipətin. Roiu, nəkotitun məsin nətəligən rəhatimat, məto iakolkeike pik məmə nian kit onəkotitun rafin. Kən e nolən əh, nian İərəməərə İesu otuwa min, itəmat onəkotagien otimat tahmen min məmə itimat ekotagien otəmat.

¹⁵⁻¹⁶Məto-inu enitun məmə nakotagien otimat, nıkkik təht məmə nian ekatuwin Masetonia, ekaupən mımna məplan itəmat, kən nian ekıtəlig Masetonia, ekımnə min məplan itəmat. Tol nəhlan, nakatos nəwirən mau kəiu. Kən uarisig e itəm min əh, onəkotasitu lak motahl-ipən io ekuwin nitən Jutia. ¹⁷?Nikitəmat təht məmə, nian emol

nətəligən min əh, məto emol əpnapin əm? ?O, kəm-naka nətəligən rəhak təmisi-pən e nolən rəha nətueintən, tahmen e netəmim itəm koatən “əwəh” ne “kəp” e nəghatən kitjəh əm?

¹⁸ Itəmat nəkotitun məmə Uhgın nian rafin tatol rəhan nəghatən, kən io min, rəhak nəghatən kəm itəmat sənəmə, “əwəh” ne “kəp,” ¹⁹ məto-inu rəhak nəghatən o Nəti Uhgın İesu Kristo, itəm eməhalən-iarəp kəm itəmat itiməhal Saelas ne Timoti, sənəmə, “əwəh” ne “kəp,” məto e Kristo, nian rafin rəhak nəghatən in “əwəh,” in nıpahrienən. ²⁰ Tol nəhlan məto-inu, nat əpnapin nəniəkisən kuwəh Uhgın təmol, ilat kotuwa nıpahrienən e Kristo, inu nəghatən “əwəh” rəha Uhgın. Tol nəhlan, e Kristo, kitat koatən “Amen, əwəh” kəm Uhgın, kən moatıləs-ipər nərgin lan. ²¹ Uhgın əm tatol itimat ekoatətul əskasik e Kristo kitat min itəmat. In təmitəpun kitat, ²² kən təmol mak e nəmegəhən rəhatat məmə kitat rəhan min, kən təmələhəu-pən rəhan Narmin e nikitat məmə kitat okotitun roiu məmə rəhan nəniəkisən min, ilat rafin okotuwa nıpahrienən e nəmegəhən rəhatat o nian kit.

²³ Kən roiu, okəmə esənən nıpahrienən, pəs Uhgın otol nalpınən kəm io. Eməsuwamən Korin məto-inu esolkeikəən məmə ekən nəghatən əskasik kit kəm itəmat. ²⁴ Esotolkeikəən məmə ekotərəməərə e nahatətəən rəhatəmat, kəp. Məto ekotol wək kitat min itəmat o nagienən rəhatəmat, məto-inu itəmat ninoatətul əskasik rəkis e nahatətəən rəhatəmat.

2

¹ Tol nəhlan, enən rəkis e nıkkik məmə okol esımnə minən məpıan itəmat mol nikitəmat təhmə. ² ?Emən nəhlan

1:19: Wək 18:5 1:20: Nol əpən 3:14 1:22: 2 Kor 5:5; Efes 1:13-14 1:24: 1 Pita 5:3 2:1: 1 Kor 4:21

mæto-inu, okəmæ ekol nikitəmat tahmə, pah u ikin-un otol io nīkik tagien? Itəmat əm, itəm emol nikitəmat tahmə. ³ Kən eməte naoa əh, məmə nian ekimnə, esətoən tərət e nīkik. Esolkeikeən məmə netəmim itəm okotəkəike motol nīkik tagien, ilat okotol məmə ekəto tərət. Eməte naoa əh e nolən əh, mæto-inu enitun məmə kitat kitiaəh əm, kən nian nīkik tagien, kən nikitəmat min tagien. ⁴ Tol nəhlan, nian eməte naoa əh kəm itəmat, nīkik təpou pik otəmat, kən nīkik titəgit, nahui nəmtək taiəh otəmat. Esətoən naoa əh məmə otol nikitəmat təpou, mæto eməte məmə onəkotitun rəhak nolkeikeən asol otəmat.

Aluin nolən rat min rəha nol təfagə

⁵ Etəmim itəm təmol nəratən, təmol io ekəto tərət, mæto təmol itəmat rafin nakotəto tərət pik, mæto esolkeikeən məmə nəghatən rəhak e nat u in təskasik pik. ⁶ Nalpinən itəm itəmat tərət nəmotos-ipən kəm in tinahmen. ⁷ Mæto roiu əh, nəkotəkəike motaluin rəhan nolən rat kən motol-wir nīkin, məmə nīkin otəsəpou pikən mol təme e rəhan nəmegəhən. ⁸ Iatətapəh əskasik otəmat məmə nakotuwin motol təwir kəm in məmə in otitun rəhatəmat nolkeikeən ron. ⁹ Eməte naoa əh kəm itəmat məmə ekəplan məmə onəkotol nəwiak e natimnat rafin, o kəp. ¹⁰ Okəmæ itəmat nəkotaluin nolən rat rəha suah kit, io min ekaluin rəhan nolən. Okəmæ suah əh təmol nat tərət neen məmə io ekəkəike maluin rəhan nolən, mæto enaluin rəkis rəhan nolən e niganəmti Kristo. Emol nəhlan məmə otasitu etəmat ¹¹ məmə Setan otəsərəkinən kitat e rəhan neiueiuəən min, mæto-inu kitat kotitun rəkis rəhan nətəligən o nolən nəratən.

*Netəmim itəm koatən-iarəp
nəmnusən təwir*

¹² Nian emuwin əpəh Troas o nən-iarəpən nəmnusən təwir rəha Kristo, eməplan məmə Iərəməərə təmol suatip

kəm io. ¹³ Məto esatig əməlinuən e rəhak nətəligən məto-inu, eməsəplanən piak Taetas ikin əh. Kən emauiatipin ilat, miet muwin Masetonia.

¹⁴ Pəs kotənwiwi Uhgın, məto-inu in təmol win e rəhan tikimir min e nəluaginən. Kən tahmen e kig kit itəm təmol win e nəluaginən minatitəlig matit rəhan mopael min ne rəhan tikimir min, Uhgın tatit itimat e Kristo. Kən itimat rəhan min netənim itəm ioatən-iarəp nenatigən rəha Kristo, kən nenatigən əh in tahmen e nəmiəwin kit itəm tatuwin ikin pisin-pisin min. ¹⁵ E niğanəmti Uhgın, itimat ekotahmen e nəmiəwin rəha Kristo kəm netənim rafın, netənim itəm Uhgın tatosmegəh ilat, ne netənim itəm okotuwın e nalpınən rəha Uhgın. ¹⁶ Itimat nəmiəwin rəha nimisən kəm neen itəm tatəgətun ilat məmə okotimis. Kən itimat nəmiəwin rəha nəmegəhən kəm neen, itəm tatəgətun ilat məmə Uhgın otosmegəh ilat. ?Kən pah u titun nolən wək asol əh? ¹⁷ Məto itimat esotahmenən e netəm ərnapın min, itəm koatən-iarəp nəghatən rəha Uhgın o nos əmən məni. Kəp, məto Uhgın təmahl-ipən itimat, kən e Kristo, itimat ekotən-iarəp namnusən təwir e niğanəmti Uhgın, kən nəghatən rəhatimat təmisi-pən e nikitimat itəm tətuatip əm.

3

¹ Okəmə naka nikitəmat təht məmə enoatıləs-ipər itimat məmə itəmat onəkotegəhan lan. Netənim neen okotəkəike motos naoa kit itəm kəməte elat nian koatuwin o netəm kotəruru ilat. ?Tahro nikitəmat təht məmə suah kit otəkəike məte naoa nəhlan etimat kəm itəmat? ?O, tahro itəmat əm nakotolkeike məmə onəkotəte? !Kəp! ² Itəmat atip əm nəkotahmen e naoa itəm tatol əp wək rəhatimat. Naoa əh kəməte-pən e

2:12: Wək 14:27; 1 Kor 16:9 2:13: Wək 20:1 2:16: Luk 2:34;
2 Kor 3:5-6 3:1: Wək 18:27; 2 Kor 5:12

nikitimat, itəm netəmim rafin koatafin kən moatitun.
³ Itəmat noa rəha wək rəhatimat. Kən nəmegəhən rəhatəmat tatəgətun məmə itəmat naoa kətafin itəm Kristo təməte. Kristo təməte naoa əh e Narmin Rəha Uhgın itəm tatəmegəh, məto təsəteən e nelmi etəmim. Kən in təməsəte-pənən e kəpiel epin-epin, məto təməte-pən e niki netəmim.*

⁴ Itimat esotəgınən o nənən nəhlan otəmat məto-inu itimat ioatətig e Kristo, kən moatahatətə əskasik e Uhgın.
⁵ Nikitimat təsəhtən məmə itimat əm ekotahmen o nolən wək u, ne noan rəha wək. Məto Uhgın əm tatol məmə itimat ekotitun nolən wək. ⁶ In təmol məmə itimat ekotahmen məmə ekotuwa rəhan iolwək min rəha nəniəkisən wi rəha nasituən itəm Uhgın təmən. Nəniəkisən wi əh təsisipənən e Lou itəm kəməte, məto təmisi-pən e Narmin Rəha Uhgın, məto-inu Lou itəm kəməte tatol məmə netəmim koatuwin o nimisən, məto Narmin Rəha Uhgın tatos-ipa nəmegəhən.

Nəhag-əhagən rəha Nəniəkisən Wi Rəha Nasituən

⁷ Otətəlig-in-tu. Nian Uhgın təməte Lou e kəpiel, mos-ipən kəm Moses, nəhag-əhagən əh-ikin rəha Uhgın, kən nəhag-əhagən əh təmalpin niganəmti Moses, kən netəm Isrel okol kəsotəplanən niganəmtin, nat əpnəpin nəhag-əhagən tinateiuaiu. Kən okəmə wək rəha Lou in suatip itəm tatuwin o nimisən, məto in təhag-əhag,
⁸ kən wək rəha Narmin Rəha Uhgın otəhag-əhag pik.
⁹ !Okəmə wək itəm kəmakil netəmim məmə otəkəike motimis, in tatəhag-əhag, kən wək itəm tatol netəmim

3:2: 1 Kor 9:2 * 3:3: Nian Pol tatəghat e nəghatən
 “kəməsəte-pənən e kəpiel epin-epin,” tatəghat e Lou itəm Uhgın təmos-ipən kəm Moses, kən Moses təməte e kəpiel.

3:3: Eks 24:12; Jer 31:33; Esik 36:26-27 3:4: wək 20:31 3:6: Jer 31:31; Jon 6:63; 1 Kor 11:25 3:7: Eks 34:29

kotətuatip e niganəmti Uhgín, in tatəhag-əhag pik agín! ¹⁰ Nípahrienən, nəniəkisin oas rəha nasituən itəm təməhag-əhag aupən, roiu in təsəhag-əhagən, mətə-inu nəniəkisin wi itəm təhag-əhag pik agín, tinaprəkis-in itəm aupən. ¹¹ !Kən okəmə wək rəha Lou itəm otəpanikə, tinuwa e nəhag-əhagən, kən wək rəha Narmin Rəha Uhgín itəm otatig lilin, tatəhag-əhag pik agín-əh!

¹² Tol nəhlan, mətə-inu emotələhəu-pən əskasik rəhatimat nətəligən e wək əh rəha Narmin Rəha Uhgín, nətəligən rəhatimat təskasik e Uhgín, kən məsotəginən o nən-iarəpən rəhan nəghatən. ¹³ Itimat esotahmenən e Moses, itəm təmətəlpin niganəmtin e niməhan agege məmə netəm Isrel okəsotəplanən məmə nəhag-əhagən teiuaiu muwin mikə. ¹⁴ Mətə Uhgín təmöl nətəligən rəhalat tiəkis. Kən mətəorus-pa əh-roiu, niməhan əh tətəhtosig-in nətəligən rəhalat nian kotəfin Naoa Rəha Nəniəkisən Oas.† Uhgín təsos-irəkisən əh niməhan əh, mətə-inu tatos-irəkis əm e Kristo. ¹⁵ Əwəh, mətəorus-pa əh-roiu ne, nian kotəfin Lou rəha Moses, niməhan kit tatəfətain nikilat. ¹⁶ Mətə okəmə etənim pah təuhlin mətəg-pən o Iərəməərə, niməhan əh otiet rəkis. ¹⁷ Otətəlig-in-tu, Iərəməərə əh, in Narmin. Kən ikin Narmin rəha Iərəməərə tətətig ikin, in tatikis kitat. ¹⁸ Kən kitat, itəm kəsəfətainən niganəmtitə e niməhan, koatəplan nəhag-əhagən asol rəha Iərəməərə, kən netənim koatəplan nəhag-əhagən əh e nəmegəhən rəhatat. Kən in tatəuhlin nəmegəhən rəhatat məmə okotuwa kahmen lan e nəhag-əhagən itəm rəhan nəsanənən tatər tatər. Kən nəhag-əhagən əh təmisipən o Iərəməərə itəm in Narmin Rəha Uhgín.

3:9: Dut 27:26; Rom 1:17 3:11: Luk 22:31 3:12: Wək 14:27; 1 Kor 16:9
 3:13: Eks 34:33 † 3:14: “Naoa Rəha Nəniəkisən Oas” in “Oltesteman.” 3:16: Eks 34:34 3:17: Jon 8:36; Rom 8:2

4

Nat keike e kipəhau oas

¹ Tol nəhlan, nikitimat təsəpouən o wək u mətə-inu itimat emotos e nasəkitunən rəha Uhgın. ² Mətə e nolən rəhatimat esotegəhan-inən nolən itəm tatəhluaig ne nolən aulis min. Ko esoteiuəən məsotəuhlinən nəghatən rəha Uhgın. !Kəp! Mətə itimat ioatən ətuatip əm nıpahrienən, kən e nolən əh, e nıganəmti Uhgın, emotolarəp e nıganəmti netəmim rafin məmə rəhatimat nolən in tətuatip. ³ Kən okəm-naka namnusən təwir itəm ekoatəniarəp in tatəhluaig o netəmim neen, mətə kəp, tatəhluaig əm o netəmim itəm koatətəu-pən suatip o nuwinən e nigəm asol. ⁴ Koatətəu-pən suatip əh mətə-inu Setan, u in lərmis itəm tatəramərə e nətueintən u, təməfətəin nətəligən rəhalat, məmə kəsotəplanən nəhag-əhagən wir rəha namnusən təwir itəm tatuəp mətəsiəgəpın ilat. Nəhag-əhagən əh təmisi-pən e Kristo. Kən nian kitat koatəplan Kristo, kən kitat koatəplan məmə Uhgın in tahro nulan. ⁵ Itimat esotən-iarəp atipən itimat, mətə ioatən-iarəp İesu Kristo məmə in ləramərə, kən itimat iolwək min rəhatəmat o nərgi İesu. ⁶ Tol nəhlan mətə-inu Uhgın u təmən məmə, “Pəs nəhag-əhagən tuəp masiəgəpın ikin tapınəp ikin,” in təmasiəgəpın e nikitat məmə kitat kotitun nehmən nəsanənən, ne nepətən əhag-əhag rəha Uhgın, kən kitat koatehm natimnat min əh e nıganəmti Kristo.

⁷ Mətə kitat koatos nat keike əh e kipəhau oas, inu nıpətitat. Tol nəhlan məmə otəgətun məmə nəsanənən wir əh taprəkis, təmisi-pən e Uhgın, təsisi-pamən otat. ⁸ Nəratən tepət koatıləs pikən itimat e suatip min rafin, mətə təsərəkinən itimat. Nian neen ekotəruru suatip,

mæto esotapəsən nalkutən. ⁹ Netəmim koatol nəratən kəm itimat, mæto Uhgın təsapəsən itimat. Koatoh itimat, mæto kəsotərəkinən itimat. ¹⁰ İkin pəhrüən ioatuwin ikin, katohamnu nipətīmat tahmen e kəməhamnu İesu. Tol nəhlan məmə, netəmim okotəplan nəmegəhən rəha İesu e nipətītat. ¹¹ Kən itimat itəm ekoatəmegəh, nian rafin kategəhan-in itimat məmə ekotimis o nərgi İesu. Tol nəhlan məmə netəmim okotəplan rəhan nəmegəhən e nipətītat itəm otəpanimis nian kit. ¹² Kənu, nian rafin itimat ioatıləs pikən nımisən məmə itəmat onəkotitun nəmegəhən itulın.

¹³ Naoa Rəha Uhgın tatən məmə, “Emahatətə, kən tol nəhlan ekatən.” Kən e nolən kitiəh əm rəha nahatətəən, itimat min ekotahatətə, kən tol nəhlan ekoatən, ¹⁴ mæto-inu itimat ekotitun məmə, etəm təmol İərəmərə İesu təmegəh min e nımisən, in otol itimat ne itəmat, kitat rafin kotəmegəh min e nımisən kitat İesu, kən məf-iarəp kitat e nıganəmtin. ¹⁵ Natımnat rafin u o nəwırən rəhatəmat, kən nian nəwırən rəha Uhgın tatiuwpə netəmim tēpət təhmin min okotuwa o Kristo, kən okotos-ıpən nənwıwıən tēpət kəm Uhgın, kən okotıləs-ıpər nərgin ilis ilis agin.

¹⁶ Tol nəhlan, nıkitimat təsəpouən. Nat əpnapın məmə nipətītat tateıuauı roıu, mæto Uhgın tatol nıkitimat tatuwiwi nian rafin. ¹⁷ Tol nəhlan mæto-inu, nəratən itəm koatatig lan, ilat nat əpnapın əm, kəsotatigən tuwəh. Mæto noalat in nəhag-əhagən wir itəm otətatig lili, kən in təwir məfigəm taprəkis-in ilat. ¹⁸ Kən tol nəhlan, nıganəmtitāt kəsotətulən e nat itəm katəplan, mæto koatətul e nat itəm kəsəplanən, mæto-inu nat itəm

katəplan in nat rəha roiu əm, otəpanikə, mətə nat itəm kəsəplanən in namnun tikə.

5

Nipətīn wi əpəh e nego e neai

¹ Tol nəhlan, kotitun məmə nipətītāt in tahmen e nimə tapolən itəm kitat kotatīg lan ikin-u e nətueintən, kən nian kit otəmnəmit mərat. Kən nian nimə tapolən əh tikə e nətueintən, mətə əpəh e nego e neai, rəhatat nimə wi əh-ikin itəm sənəmə etəmim təmol, mətə Uhgīn əm təmol, nipətītāt wi itəm otatīg lilin. ² Mətə roiu e nipətītāt rəha nətueintən, koatəhg nikitat, kən kotalkeike pik məmə nian otatuwa itəm kitat okotuwin e nipətītāt wi rəha nego e neai, tahmen e kitat koatuwin e natimnat wi. ³ Tol nəhlan mətə-inu sənəmə kitat okotuwa narmin əm nipətīn tikə, mətə okotos nipətīn wi rəha nego e neai. ⁴ Nipətītāt itəm otimis tol kitat koatekimis moatehag rəha nəpouən, mətə sənəmə koatolkeike məmə okotimis kən nipətītāt otikə, kəp. Mətə kitat kotalkeike məmə okotuwin e nipətītāt wi məmə nəmegəhən lilin otəwiək nipətītāt rəha nətueintən itəm otimis. ⁵ Kən Uhgīn pişin əm təmol kitat o natimnat min əh, kən təmos-ipa Narmin Rəhan məmə otəgətun wir kəm kitat məmə rəhan nəniəkisən min otuwa pahrien.

⁶ Kən tol nəhlan, nətəliḡən rəhatat təkasiḡ, kən kitat kotitun wir məmə nian koatos əm nipətīn rəha nətueintən u, kitat koatətul əh ihluə imə Iərəmərə ikin rəhatat. ⁷ Kitat kotatīg e nətueintən e nahatətəən e Uhgīn, sənəmə e natimnat itəm koatəplan. ⁸ Iatən məmə nətəliḡən rəhatat təkasiḡ, kən kotalkeike məmə kotapəs nipətītāt motuwīn e nimə wi rəhatat kitat Iərəmərə. ⁹ Tol nəhlan,

4:18: Kol 1:16

5:1: 2 Kor 4:7

5:2: Rom 8:23

5:6: Hip 11:13-16

5:8: Fil 1:23

okəmə kotatig e nipətitat, o okəmə kotapəs nipətitat rəha nətueintən, kitat kotalkut pik məmə kotol natimnat itəm koatol niki İərəməərə tagien. ¹⁰ Kotol nəhlan məto-inu kitat rafin okotəkəike motətul aıpən e Kristo məmə in otakil rəhatat nolən min, kən kitat kitiəh kitiəh okotos nətouən tətəu-pən natimnat itəm kəmotol e nətueintən, okəmə nat təwir o nat tərat.

Ien əhrui min rəha Uhgın

¹¹ Kən roiu əh, məto-inu ekotisiai-in İərəməərə, kən motalkut məmə ekotiuw-pa netənim. Uhgın titun itimat ne wək rəhatimat, kən ekotolkeike məmə itəmat min onəkotitun wir itimat. ¹² Esotolkeikeən məmə ekotiləs-ipər itimat e niganəmtitəmat, məto ekotos-ipinə rəhatimat nətəligən məmə okəm-naka nikitəmat otagien otimat. Kən roiu, nəkotitun nuhalpinən nəghatən rəha netənim itəm kotausit o nolən itəm netənim koatəplan, məto nikilat təsəhtən nat itəm tətətig e niki etənim. ¹³ Okəmə itimat ialməl min, məto o nərgi Uhgın. Kən okəmə rəhatimat nətəligən tətəuatip əm, in nat kit itəm otasitu etəmat.

¹⁴ Tol nəhlan məto-inu, nolkeikeən rəha Kristo tatərəməərə etimat, məto-inu itimat ekotitun wir məmə suah kitiəh əm tənimis o netənim rafin, kən tol nəhlan, netənim rafin kinotimis. ¹⁵ Kən tənimis o netənim rafin məmə ilat itəm koatəmegəh, okotapəs nolən natimnat itəm ilat əm kotolkeike, məto ilat kotəkəike motol nolən min itəm İesu tolkeike, u etəm tənimis olat kən məmegəh min e nimisən.

¹⁶ Tol nəhlan, roiu ne, itimat esotakilən netənim e nolən itəm netənim rəha nətueintən kotakil netənim lan. Nat əpnarın nian kit emotakil Kristo e nolən əh, məto roiu esotolən. ¹⁷ Tol nəhlan, okəmə suah kit təmuwa kitiəh ilau Kristo, in təmuwa etənim wi. !Nat oas təmikə,

kən nat wi tinuwa! ¹⁸ Natimnat rafin min əh tətisi-pən e Uhgın. Aupən kitat tikimir min kitat Uhgın, məto e Kristo, in təməmik kitat kotuwa iuəhkır ron, mol kitat iolin min. Kən təmos-ıpa kəm itimat wək u rəha niuw-pamən tikimir min rəha Uhgın okotuwa iolin min. ¹⁹ Inu tatən məmə Uhgın təmiuw-pa rəhan tikimir min e nətueintən məmə okotuwa iolin min e Kristo, kən məsafin minən rəhalat nolən rat min. Kən təmos-ıpa kəm itimat nəghatən u rəha niuw-pamən tikimir min rəhan okotuwa iolin min.

²⁰ Tol nəhlan, itimat ien əhruin min rəha Kristo, kən tahmen məmə Uhgın tətəun-in netəmim e nəwiatimat. Kən ioatətapəh əskasik otəmat e nərgi Kristo məmə: nakotapəs nolə tikimir, kən motuwa ioli Uhgın min. ²¹ Uhgın təmol suah u itəm rəhan nolən rat tikə, məmə in sakrifais rəha nolən rat min rəhatat, məmə e in, kitat okotətuatip e nigənəmti Uhgın.

6

¹ Məto-inu itimat ioatol wək kitiah itimat Uhgın, ekotətapəh əskasik otəmat məmə nian Uhgın tətawte-in rəhan nəwirən kəm itəmat, nəsotosən tahmen in nat əpnəpin əm, ² məto-inu Uhgın tatən məmə, “E nian ətuatip, eməto ik, kən e nian rəha nosmegəhən, emasitu lam.” İakən kəm itəmat, məmə roiu, in nian ətuatip rəha Uhgın, roiu in nian rəha nosmegəhən.

Nian əskasik min e nəmegəhən rəha Pol

³ Esotolən nat kit itəm suah kit otəme lan e rəhan nahatətəən, məto-inu esotolkeikeən məmə okəsən ratən wək rəhatimat. ⁴ Məto nolən min rafin e nəmegəhən rəhatimat koatəgətun məmə itimat iolwək min pahrien rəha Uhgın: itimat ekotətul əskasik e nian rəha nəratən,

ne nian iäkis min, ne nian itimat ekotəto tərət. ⁵ Netənim kəmotoh itimat, kən kəmki-pən itimat e kalapus, kən katitəp itimat məmə okoh itimat. Emotol pik wək, məsotapilən lapin, kən nəumis tus itimat. ⁶ Esotolən nolən kit itəm tatol nikitimat tamkimik, itimat ekotenatig, nətəligən rəhatimat kaifəməh, ekotol təwir kəm netənim, Narmin Rəha Uhgın tatər e nikitimat, kən ekotolkeike netənim e nolkeikeən pahrien. ⁷ Ekoatən əm nıpahrienən, kən nəsanənən rəha Uhgın tətətig etimat. Rəhatimat nolən ətuatip in tahmen e natimnat rəha nəluaginən o nohən ne nətlosigən. ⁸ Netənim neen koatisiai-in itimat, neen koatehm-əhau itimat, neen koatən rat itimat, neen koatən wir itimat, neen koatən məmə itimat ekoateiuə məmə itimat iolwək min rəha Uhgın, məto itimat iolwək min pahrien rəhan. ⁹ Netənim neen kəsotegəhan-inən məmə itimat aposol min pahrien, məto netənim tepət koatən məmə itimat aposol min pahrien. Nian rafin nimisən tatitəp itimat, məto ekoatəmegəh əh. Katoh itimat, məto kəsəhamnuən əh itimat. ¹⁰ Nikitimat təpou, məto nian rafin ekotagien əh. Rəhatimat nautə tikə, məto itimat ekotol netənim tepət rəhalat nautə tepət. Rəhatimat nat kit tikə, məto ekoatos natimnat rafin.

¹¹ Piak min əpəh Korin, emotən rafin nəghatən kəm itəmat kəsəpəsən kit, kən ekotolkeike itəmat e nikitimat rafin. ¹² Itimat esotahtosig-inən nolkeikeən rəhatimat otəmat, məto itəmat notahtosig-in rəhatəmat otimat. ¹³ Roiu əh, iatəghat kəm itəmat məmə itəmat nenətik ətuatip. Tətuatip əm məmə itəmat min, nakotolkeike itimat e nikitəmat rafin.

¹⁴ Sotənən kəm netəm kəsotəfakən məmə nəkoatol wək kit itəmat min ilat. ?Nolən ətuatip ne nolən nərat kiatur nol kələhən nat kit? ?O, nəhag-əhagən ne napinəpən

6:5: 2 Kor 11:23-27

6:6: 1 Tim 4:12

6:9: 2 Kor 4:10

6:13: 1 Kor

4:14

kiatun nuwamən məpələh kələh muəghat? !Kəp! ¹⁵ Kən e nolən kitiəh əm, Kristo ne Setan, okol kəsuənən nəghatən kitiəh nian kit. ?İəfak ne etəm təsəfakən kiatun nolən nat e nətəligən kitiəh? !Kəp! ¹⁶ E Nimə Rəha Uhgın, ikin kit tikə əh-ikin o narmi nat min, məto-inu kitat u Nimə Rəha Uhgın itəm tatəmegəh. Kən Uhgın təmən məmə,

“Ekatiğ itimat min ilat,
kən maliwək itimat min ilat,
kən ekuwa io Uhgın rəhalat,
kən ilat okotuwa rəhak netəmin.”

¹⁷ Kən İərəməərə təmən məmə,
“Tol nəhlan, otiet rəkis elat, motan isəu olat.
Kən məsotekən nat itəm tamkimik e niganəmti Uhgın,
kən nıkk tagien məmə ekos itəmat.”

¹⁸ “Kən ekuwa rəhatəmat tata,
kən itəmat onəkotuwa nenətik min,” inu nəghatən rəha
İərəməərə itəm in ilis ağın.

7

¹ İolik min. Nəniəkisən min u rəhatat. Kən tol nəhlan, pəs kotafəl nıkkıt, motos-irəkis natimnat rafın itəm koatol nıpətıt ne narmitat kotamkimik. Kən pəs kotələhəu kalın kitat məmə rəha Uhgın əm motətəu-pən rafın suatıp itəm nıkkın otagien lan.

Niki Pol təmagien olat

² Oterəh e nıkkıtəmat kəm itimat. Esotolən tərət kəm suah kit, esotıuw-pənən suah kit tərət ikin, esotalkutən məmə ekotos nat kit rəhatəmat e nolən eko-eko. ³ Esənən nəghatən u məto-inu nəmotol nolən rat. Emən rəkis kəm itəmat məmə ekotolkeike pıkk itəmat nian rafın, kən nat əpnəpın nımisən o nəwırən otuwa e nəmegəhən

6:14: Efes 5:11 6:16: Lev 26:12; Esik 37:27; 1 Kor 3:16 6:17: Aes 52:11; Esik 20:34,41; Nol əpən 18:4 6:18: 2 Saml 7:14; 7:8; Jer 31:9

rəhatimat, məto itəmat əpəh imə e nikitimat. ⁴ Io etahatətə əskasik etəmat. Iatausit otəmat. Itəmat nəmotiləsipər pik rəhak nətəligən. Emos nəratən tepət təmuwa e rəhak nəmegəhən, məto nīkik tagien maprəkis otəmat.

⁵ Tol nəhlən məto-inu, nian emotuwa Masetonia, esotəmegən, məto nian rafin, nəratən tatiləs itimat təmisi-pən ikin pisin pisin min. E nəmegəhən rəhatimat, netəmin kəmotəμου motol nəratən kəm itimat, kən itimat ekoatəgin. ⁶ Məto Uhgın tatol kepin netəmin itəm nətəligən rəhalat təpou, kən təmol kepin itimat e nuwamən rəha Taetas. ⁷ Kən sənəmə e nuwamən əm rəhan itəm təmol nikitimat tagien, məto e nəghatən wir rəha nol kepinən itəm nəmotən-ipən kəm in. In təmən-ipa kəm itimat məmə itəmat nakotolkeike pik məmə nəkotəplan io, kən təmən məmə nikitəmat tatəto tərat o nəghatən rəhak, kən təmən məmə nakolkeike pik io moatətul əskasik o nərgək. Nian eməto, nagiənən e nīkik təmər mərioah.

⁸ Nat əpnəpin okəmə rəhak naoa əpən təmol itəmat nakotəto tərat, məto esətoən tərat ron. Məto əpən, eməto tərat ron, məto-inu eməplan məmə naoa u təmol itəmat nakotəto tərat, məto rəha nian əkuəkir əm. ⁹ Məto roiu, nīkik tagien, kən sənəmə məmə nəmotəto tərat, kəp. Nīkik tagien məmə nian nəmotəto tərat, nəmotəuhlin itəmat e rəhatəmat nolən rat min. Nipəhriənən, Uhgın tolkeike məmə kitat okotəto tərat o nolən tol min-nulan. Kən məto-inu nəmotəuhlin itəmat, kən natimnat itəm emotən əpən kəm itimat təməsolən məmə nəmotəkiəh e rəhatimat nahatətəən.

¹⁰ Kən nian koatəto tərat e nolən itəm Uhgın tolkeike, kən kotəuhlin kitat e rəhatat nolən rat, kən Uhgın tatosmegəh kitat. Kən nīkitat otəsəpouən o nolən əh. Məto nian koatəto tərat e nolən rəha nətueintən,

tatiuw-pən kitat e nimisən. ¹¹ Otəplan-tu nəmegəhən rəhatəmat nian nəmotəto tərət e nolən itəm Uhgın tolkeike. Nolən əh, noan tərət: nakotolkeike motalkut əskasik məmə nəkotol nolən ətuatip, kən motoalkut əskasik məmə nokotəg-ətuatip-in rəhatəmat nolən rat min, kən motetəhau nolən rat min, kən narmitəmat təmiwig nəmotaut motəgin nolən rat min. Nəmotolkeike məmə nəkotəplan min io, kən nakotolkeike pik məmə nakotətul əskasik o nərgək. Kən nəmoatətul matip məmə nəkotol nalpinən kəm netəm kotol nolən rat. E nolən min rafin rəhatəmat, nəmotəgətun məmə nəsotolən nat kit tərət e natimnat u. ¹² Kən eməte naoa u kəm itəmat, məto esətəən o suah u itəm təmol nolən rat, kən esətəən o suah u itəm in təmərəkin. Kəp. Eməte ilə məmə itəmat onəkotəplan əsas e niganəmti Uhgın məmə nəkoatətul əskasik o nərgitimat. ¹³ Natimnat rafin min əh koatıləs-ipər nətəligən rəhatimat.

Sənəmə itimat əm itəm nəmoatıləs-ipər nətəligən, məto nikitimat tagien pik o Taetas, məto-inu nikin tagien məmə nəmoatıləs-ipər min nətəligən rəhan. ¹⁴ Emən-ipən kəm in məmə etausit pik otəmat, kən itəmat nəməsotolən io ekaulis. Natimnat rafin itəm emotən kəm itəmat, ilat nıpahrienən. Kən e nolən kitiəh əm, natimnat rafin itəm emotən kəm Taetas etəmat, kən motausit ron, ilat min nıpahrienən. ¹⁵ Taetas, nikin tatəht əh məmə itəmat rafin aɡın-əh nəmotol nəwian, kən moatəgin moatasiəp nian nəmotegəhan-in məmə otuwa məplan itəmat. Kən nian nikin tatəht natimnat min əh, nolkeikeən rəhan otəmat tatər təhmin min. ¹⁶ Nıkik tagien pik məto-inu etahatətə əskasik etəmat məmə nəkoatol naka itəm tətuatip.

8

Pol təmətapəh məmə okotawte

¹ Piak min ne winik min, ekotolkeike mämә näkotitun näwirән räha Uhgın itәм tәмawte-in kәм nimәfak min әpәh Masetonia mämә ilat kotitun nasituән e netәmim neen min. ² Ilat kәmotatig e nәratән asol kit ne nian әskasik min, kән nat әpnapın ilat nan rat rәhalat nautә tikә agın, mәto nәmegәhән rәhalat tәrioah wir e nagianән. Kән nan ratән ne nagianән kәmuoe-in nolән tәwir. E nolән әh, kәmotәrakin мәni tәpәt motos-ipән kәм iәfak min әpәh ikin min. ³ Iatән-iarәp kәм itәmat mämә ilat kәmotos-ipән tәpәt, taprәkis-in itәм netәmim nikilat tәht mämә okol kәsotolән. Kән ilat atip kәmotol. ⁴ Kәmotәtapәh amul otimat mämә itimat ekotegәhan pәs ilat kotasitu e wәk räha nos-ipән мәni kәм iәfak min әpәh Jerusalem. ⁵ Kәmotaupән kos-ipән nәmegәhән rәhalat kәм Iәrәmәrә, kән uarisig, kәм itimat, e nolән itәм Uhgın tolkeike. Nikitimat tәsәhtән mämә okotol tәpәt nәhlan, mәto kәmotol.

⁶ Kән tol nәhlan, emotuәh niki Taetas mämә otitәlig-pinә otәmat. In tәmaupән mәghat kәм itәmat o nolән nat u, kән tol nәhlan, emotәtapәh mämә in otәghat kәм itәmat mämә näkotol namnun wәk wir räha nawteән әh itәм nәmotәtuoun. ⁷ E natimnat min u rafın, itәmat nәmotol tәwir pik maprәkis, inu nahatәtәән rәhatәmat, ne nәghatән rәhatәmat, ne nitunән rәhatәmat, ne nolән räha nәtul әskasikән, ne nolkeikәән rәhatәmat otimat. Kән roiu, iakolkeike mämә näkotol wәk kit min e nolән tәwir pik maprәkis, inu wәk wir räha nawteән.

⁸ Esәнән mämә näkotәkәike motol. Mәto emotәgәtun kәм itәmat mämә netәм pisin pisin min nikilat tagien o nasituән e wәk әh. Kән roiu әh, iakolkeike mämә ekisilu wir mämә nolkeikәән rәhatәmat in nipahrienән tahmen elat, o kәp. ⁹ Itәmat näkotitun wir näwirән räha

Ierəmərə Iesu Kristo itəm təmawte-in kəm itəmat, məmə nat əpnapin rəhan nautə tepət, məto təmol otəmat məmə in rəhan nautə tikə. Kən məto-inu təmol məmə rəhan nautə tikə, kən mol itəmat rəhatəmat nautə tepət.

¹⁰ Kən inu rəhak nətəligən e natimnat min u, itəm ota-situ etəmat. Otol namnun e wək itəm nəmotətuoun e nup uarisig. Nikitəmat təmaupən məht məmə nəkotol wək əh, kən itəmat nəmotaupən motətuoun motol. ¹¹ Tol nəhlan, roiu otol namnun wək u rəha nos-ipənən. Kən rəhatəmat nətəligən o nolən wək u itəm nakotolkeike pik məmə nəkotol, in otuwa nipahrienən, kən itəmat onəkotol e rəhatəmat atip natimnat. ¹² Okəmə nikitəmat tagien o nos-ipənən, kən Uhgın nikin tagien o nosən natimnat əm itəm nakoatos moatos-ipən. Kən in təsətapəh-inən natimnat itəm tikə otəmat.

¹³ Esotolkeikeən məmə nəmegəhən rəha netəmim neen otimətig məto-inu kəmos rəhatəmat məni, məto nəmegəhən rəhatəmat in otiəkis məto-inu nəmotasitu elat. Kəp. Iakolkeike məmə tahmen-ahmen əm otəmat rafin. ¹⁴ Roiu, itəmat nakoatos tepət kən motitun nasituən elat. Kən o nian min neen, ilat kotitun noorən kəm itəmat okəmə rəhatəmat tikə. Kən itəmat nakotahmen-ahmen əm, ¹⁵ tahmen e itəm Naoa Rəha Uhgın tatən məmə, “Netəmim itəm kəmotəulək tepət, tahmen əm, təsəprəkisən.

Kən netəmim itəm kəmotəulək noan-məsin, rəhan nagwənən tahmen əm, təsikəən.”

Taetas təmuwın Korin

¹⁶ İatənwiwi Uhgın məmə təmələhəu-pən e niki Taetas nətəligən o nasituən etəmat, tahmen-ahmen e rəhak.

¹⁷ Tol nəhlan məto-inu Taetas, nikin tagien o nimmənən

məplan itəmat tahmen e itəm emən kəm in. Kən taprəkis-in itəm əh, nikin tagien pik o nasituən etəmat, kən in rəhan əm nətəligən məmə in otimnə məplan itəmat. ¹⁸ Kən itimat ekotahl-ipinə min piətət kit min timnə ilau min. Suah u, netəm e niməfak min koatisiai-in o rəhan wək o nən-iarəpən nammusən təwir. ¹⁹ Kən taprəkis-in inu, niməfak min kəmotitəpən məmə otuwa itimat min o niləsən mənə u muwin əpəh. Kən itimat ekotərəməyə lan o noorən məmə otiləs-ipər nərgi lərəməyə, kən matəgətun məmə nikitimat otagien pik o nasituən. ²⁰ Itimat eso-tolkeikeən məmə suah kit otən rat itimat o nolən rəha noorən mənə asol əh. ²¹ Tol nəhlan, itimat ekotalkut pik məmə ekotol nat itəm tətəuatip, mətə sənəmə e niganəmti lərəməyə əm, mətə e niganəmti netəmin min.

²² Kən ekotahl-ipinə piətət kit min iləhal suah mil u. Suah əh, e wək tepət ne nolən tepət, emotisilu wir məmə in tolkeike pik məmə otasitu. Kən roiu, in tolkeike pik məmə otasitu mətə-inu in tətəhatətə pik etəmat. ²³ Kən o Taetas, itimlau min ekioal wək kitiəh əm, kən in min tatol wək e nikitəmat o nasituən etəmat. Kən o piətət min, ilat ien əhrui rəha niməfak min, kən nolən wir min e nəmegəhən rəhalat koatisiai-in Kristo. ²⁴ Tol nəhlan, otol rəhatəmat nolən kəm suah miləhal əh məmə nakotolkeike pahrien iləhal, kən iləhal okəhalitun o nat naka itimat ekotəusit otəmat. Kən otol-wir kəm ilat məmə niməfak min okotəplan.

9

¹ Okəm əsətəən naoa u kəm itəmat, in təwir əm mətə-inu nəkotitun rəkis wək u rəha nasituən e iəfak min əpəh Jerusalem. ² İatən nəhlan mətə-inu io ekitun məmə nakotolkeike məmə onəkotasitu. Kən ematiləs-ipər nolən wir rəhatəmat o netəm Masetonia, matən kəm ilat məmə e nup itəm tinuwın rəkis, itəmat əpəh Akəa,

nəmoatətul matip o nos-ipənən. Kən nian kəmotəplan məmə nikitəmat tagien pik o nasituən, təmol min ilat tepət kotalkeike məmə okotasitu min.

³ Məto roiu, etahl-ipinə piətət miləhal u məmə iləhal okəhaləplan itəmat məmə itəmat onəkotol nat itəm nəmotən, təhmen əm məmə emən mihin, kən tol nəhlan rəhatimat nəghatən o niləs-ipərən nolən wir rəhatəmat, sənəmə nat əpnapin əm. ⁴ Məto okəmə nəsolələn, kən nian ekimnə itimat netəm Masetonia neen, kən okotəplan məmə itəmat nəsolələn əh, kən nolən əh otol itimat ekotaulis, məto-inu itimat enoatiləs-ipər rəkis itəmat. Kən otol itəmat nakotaulis taprəkis. ⁵ Tol nəhlan, nīkik təht məmə ekəkəike mətapəh o piətət miləhal məmə okotimnə rəkis pitən kəplan itəmat, kən motol namnun wək o nəmki-pamən məni asol itəm nəmotən-iəkis məmə nakotos-ipən. Məto iakolkeike məmə in nos-ipənən kit itəm tatisi-pən atip e nikitəmat, sənəmə suah kit tatəkəike kəm itəmat məmə nakotos-ipən.

Nolən nawteən

⁶ Sotaluinən nat u. Etəm tatəfe noan məsin, matəulək-in noan məsin. Kən etəm tatəfe tepət, matəulək-in tepət. ⁷ Itəmat kitəh kitəh nakəkəike mos-ipən nat naka nəmən e nīkim məmə nakos-ipən. Okəmə nīkim təsagienən ron, təsəwirən məmə nakos-ipən. Kən okəmə nakos-ipən məto-inu suah kit tatəkəike kəm ik məmə nakos-ipən, in min təsəwirən. Ekən nəhlan məto-inu Uhgın tolkeike etəm u tatos-ipən e nīkin pahrien. ⁸ Kən Uhgın titun nawte-inən nəwirən rafin agın kəm itəmat məmə e nian rafin e natimnat rafin, nakotos natimnat rafin itəm tətuatip məmə nəkotəkəike motos, kən moatos tepət min əh-ikin məmə nakotoor kəm netəmin. ⁹ Naoa Rəha Uhgın tatən məmə,
 “In tatoor rəhan natimnat tepət kəm ian-rat min,

kən rəhan nolən ətuatip tətətig lilin.”

¹⁰ Kən Uhgın itəm tatos-ipən nikuti nat o etəm tatəfe, kən matos-ipinə pıret o nunən, e suatip kitiəh əm in otos-ipinə nat tepət kəm itəmat mol in tepət min məmə, itəmat nəkotitun nasituən e netəmim neen min, kən in otol noan tepət itəm təmisi-pən e nolən ətuatip rəhatəmat.

¹¹ E natimnat rafin e nəmegəhən rəhatəmat, Uhgın otos-ipən rəhan nəwirən kəm itəmat məmə itəmat nəkotitun nawtəən e nian rafin. Kən nian ekotoor rəhatəmat nasituən, netəmim okotənwiwi Uhgın ron.

¹² Wək u itəm itəmat nəkotol, tatos-ipən məni o nagwənən kəm netəmim rəha Uhgın u nəumis tatus ilat, məto tatol nat wir kit min taprəkis, inu nənwiwiən itəm təmər mərioah e niki netəmim matuwin o Uhgın. ¹³ Nian nəkotol wək u, natol-arəp nolən rəhatəmat kəm netəmim tepət. Kən ilat okotiləs-ipər nərgi Uhgın ron, məto-inu itəmat nəkoatol pahrien nolən rəha netəmim itəm koatən nıpahrienən e namnusən təwir rəha Kristo. Kən okotiləs-ipər nərgi Uhgın o nawtəən rəhatəmat e məni asol kəm ilat ne netəmim rafin. ¹⁴ Kən nian koatəfak otəmat, nikilat tuwin otəmat məto-inu Uhgın təmawte-in rəhan nəwirən kəm itəmat taprəkis aɡin-əh məmə nəmotasitu pik elat. ¹⁵ !Pəs kotən kəm Uhgın məmə nikitat tagien o Nətin itəm təmos-ıpa kəm kitat, u in nat təwir aɡin maprəkis!

10

Pol təmuhalpın nəghatən e rəhan wək

¹ Io Pol, io atip, iatəkəike e nat kit kəm itəmat. Netəmim neen koatən məmə nian kitat min itəmat, rəhak nətəligən in ləhau əm, məto nian ekiet rəkis etəmat, rəhak nolən təskasik pik. Kristo, in rəhan nətəligən ləhau, kən in etəm mətig. Kən e nolən kitiəh əm, ² iatətapəh

9:9: Sam 112:9

9:10: Aes 55:10

9:11: 2 Kor 1:11; 4:15

10:1: 1

Kor 2:3

otəmat məmə, onəkotol nolən rəhatəmat tətuatip məmə nian ekimnə, məsəhai pikən itəmat. Məto ekitun məmə ekəhai netəmim neen u koatən məmə ekoatətəupən nolən rəha nətueintən u, ³ məto-inu nat əpnapin ekotatig e nətueintən u, itimat esotəluaginən e nolən rəha nətueintən u. ⁴ Natimnat rəha nəluaginən itəm itimat ekoatəluagin lan, sənəmə nat itəm nətueintən koatəluagin lan. Kəp, natimnat rəhatimat, ilat koatos nəsanənən rəha Uhgın o nərəkinən ikin tiəkis o nuwinən ikin ima tikimir min. ⁵ Itimat ekoatərəkin nəghatən eiueiuə min ne nətəligən ausit min, ilat rafin itəm koatən-iəhau netəmim o nitunən Uhgın. Nətəligən min rafin itəm tikimir min rəha Uhgın, itimat ekoatəluagin elat, motol win elat, motol məmə ilat rafin okotol nəwia Kristo. ⁶ Kən nian itəmat nakotətəupən wir nəwia Kristo, itimat ekoatətul matip o nolən nalpinən kəm netəmim rafin itəm koatəht nəwian.

⁷ Itəmat nakoatəplan nat itəm ihluə, məto nəkotəruru nipətin. Okəmə suah kit titun pahrien məmə in etəmim rəha Kristo, kən in otətəlig-in wir min məmə itimat min rəha Kristo tahmen lan. ⁸ Nat əpnapin iatəghat ausit məsin o nepətən itəm lərəməərə təmos-ipa, okol esaulisən ron. Təmos-ipa o niləkinən itəmat, sənəmə o niləs-iəhauən itəmat. ⁹ Esolkeikeən məmə nikitəmat təht məmə ekəte naoa min kəm itəmat e nolən itəm netəmim neen koatən, məmə otol itəmat nakotəgin. ¹⁰ Ilat kotən rat io məmə, “Rəhan naoa təfigəm kən masilə, məto nian tətən kitat min, in sənəmə etəm əskasik kit, kən rəhan nəghatən in nat əpnapin əm.” ¹¹ Netəm tol nəhlan kotəkəike motitun məmə, nolən rəhatimat itəm koatəplan e naoa min emotahl-ipən nian itimat isəu, məto nian ekotimnə, ekotol rafin nolən min əh.

¹² Esotolkeikeən məmə ekotəplan ahmen itimat ne netəm pişin neen itəm koatıləs-ipər atip ilat. !Kəsi, itimat esotahmenən! !Kəp, iatəsan əm! Nian ilat atip əm koatəplan ahmen ilat min, kən koatakil atip əm ilat min, tol rəhalat nitunən talməl. ¹³ Məto itimat, esotəghat ausitən taprəkis e nepətən rəhatimat, məto ekotəghat ausit e wək itəm Uhgın təmələhəu-pən məmə rəhatimat, kən wək u, itəmat min əpəh ikin. ¹⁴ Kən nəghat ausitən e nepətən rəhatimat otəmat in ətuatip əm, in təsepət pikən. Okəmə esotuwamən otəmat, okol esotəghatən nəhlan. Məto nipahrienən, emotaupən motuwa mətoarus-pa itəmat nian emotan moatən-iarəp namnusən təwir rəha Kristo. ¹⁵ Netəmim neen koatəghat ausit o wək itəm suah pişin təmol. Məto itimat ekoatəghat ausit əm e wək itəm Uhgın təmələhəu-pən kəm itimat. Itimat emotələhəu-pən əskasik nətəligən rəhatimat məmə nahatətən rəhatəmat otəwiə təhmın min, kən tol nəhlan, rəhatimat wək e nikitəmat otol iahgin mepət, ¹⁶ kən tol nəhlan, ekotitun nuwinən motən-iarəp namnusən təwir e ikin min e nıkalı imatəmat ikin muwin təhmın min. Kən e nolən əh, itimat esotolən wək e ikin kit itəm suah kit tinol wək rəkis ikin, kən məsotəghat ausitən o wək rəha etəm pişin. ¹⁷ Məto Naoa Rəha Uhgın tatən məmə, “Pəs etəm tatəghat ausit, in otəghat ausit əm e natimnat itəm İərəməərə təmol.” ¹⁸ İatən nəhlan məto-inu, kəsisiai-inən etəmim itəm tatıləs-ipər atip in, məto katisiai-in əm etəmim itəm İərəməərə tatıləs-ipər.

11

Pol ne aposol eiueiuə min

¹ İakolkeike məmə nakotegəhan-in io pəs ekən rəhak məsin nalmələn kəm itəmat. Məto pahrien, noatol

rækis. ² Iatehm wir itəmat, məsolkeikeən məmə suah kit min otəmki-rækis itəmat e nelmək, kən nolən əh rəhak təmisi-pən əm o Uhgın. Io tata rəhatəmat, kən itəmat nəkotahmen e pətan əkəku wi kit itəm kinən rækis məmə okos rəham kətim kan məmə otətəu-pən suah kitiaħ əm, nərgin u Kristo. Kən iatehm wir rəhak pətan əkəku əh məmə ekegəhan-in-pən in kəm rəhan iərman, kən in təruru əh iərman.

³ Məto iatəgin məmə onəkotahmen e If itəm Setan təmeiuə in e nəghatən ətehen. Iatəgin məmə suah kit otiuw-pən rəhatəmat nətəligən tuwin ik pisin, kən nako-tapəs rəhatəmat nolkeikeən o Kristo, itəm in tətuatip məpiə wir. ⁴ Iatən nəhlan məto-inu okəmə suah kit tatuwa otəmat matən-iarəp İesu itəm tol pisin e İesu itəm ekoatən-iarəp, o okəmə itəmat nakoatos narmin itəm tol pisin e Narmin nəmotos rækis, o nakotəto namnusən təwir itəm tol pisin e itəm nəmotos rækis, məto itəmat ialməl min, nakotegəhan-in əm. ⁵ Aposol min əh itəm itəmat nakoatən məmə ilat “aposol min ilis pik,” məto e rəhak nətəligən esəplanən məmə ilat ilis maprækis-in io. ⁶ Okəmə naka kəsəgətun wirən io e nəghatən, məto ekitun wir nəukətin namnusən təwir. Itəmat emotəgətun nat əh kəm itəmat e nolən min rafin nian tēpət.

⁷ Nian ematən-iarəp namnusən təwir rəha Uhgın kəm itəmat, esolən məmə nakotətou nat kit. Io atip əm emos-iəhau io o niləs-ipərən itəmat. ?Kən tahro? ?Nolən əh in təfagə rat kit? !Kəp! ⁸ Nian ematol wək kitat min itəmat, niməfak min ik pisin kəmoatətou io. İuəhkir tahmen məmə emakləh-in ilat məmə ekasitu etəmat. ⁹ Kən nian kəmoatan, kən rəhak nat kit tikə, esətapəhən o suah kit o nasituən məto-inu piatat min itəm kəmotisi-pən

11:2: Efes 5:26-27
15:10; 2 Kor 12:11

11:3: Jen 3:4,13
11:6: 1 Kor 2:1,13

11:4: Kal 1:8-9
11:7: 1 Kor 9:18

11:5: 1 Kor

Masetonia kəmotos-ipa natimnat itəm rəhak tikə. Tol nəhlan, esətapəh-inən nat kit otəmat, kən məsos-ipənən wək əskasik otəmat o nəhmən io, kən ekol nəhlan nian rafin. ¹⁰ Tahmen e nīpahrienən rəha Kristo tətətig lak, iatən pahrien məmə suah kit tikə ikin min rafin əpəh Akaea o nən-iəhauən io o nəghat ausitən o nəsətapəh-inən nasituən. ¹¹ ? Kən tahro ekəsətapəh-inən nat kit otəmat, mətə-inu esolkeikeən itəmat? !Kəp! Uhgın titun məmə ekolkeike pik itəmat.

¹² Netənim neen kotolkeike məmə nikitəmat təht ilat məmə kotahmen etimat e wək itəm koatəghat ausit ron. Mətə iakatakəike o nolən rəha nəsətapəh-inən natimnat məmə rəhalat nəghatən otiet morin. ¹³ Netəm nəhlan, ilat aposol eiueiuə min, kən koateiuə-in netənim e wək rəhalat. !Kən ilat koatan tahmen məmə ilat aposol min pahrien rəha Kristo, mətə kəp! ¹⁴ Mətə kəsotautən e nolən əh, mətə-inu Setan atip, tətən tahmen məmə in nagelo kit rəha nəhag-əhagən. ¹⁵ Kən sənəmə in nat kit itəm okotaut lan, okəmə iolwək min rəha Setan kotan tahmen məmə ilat iolwək min rəha nolən tətuatip. E namnun nian, ilat okotos rəhalat nətouən tətəu-pən nolən min rəhalat.

¹⁶ Ekisimatip min. Pəs suah kit tikə nikin təht məmə io ialməl. Mətə okəmə nikitəmat təht nəhlan, kən otegəhan-in io pəs ekol nolən rəha ialməl məsin, kən ekəghat ausit məsin. ¹⁷ Nəghatən u rəhak sənəmə nat itəm ləramərə təmən-ipa kəm io məmə ekən. Mətə iatəghat əm tahmen e ialməl kit. ¹⁸ Netənim tepət koatəghat ausit o nolən min rəha nətueintən, kən tol nəhlan, io min, ekəghat ausit. ¹⁹ !Ei! !Nakotenatig wir, kən tol nəhlan, motegəhan-in məmə iaməl min kotəgətun itəmat! * ²⁰ Nakotegəhan-in əm okəmə suah əpnapin kit tatol itəmat slef, o okəmə

11:9: 2 Kor 12:13; Fil 4:15-16 * 11:19: E ves 19-21, Pol tatəghat əsan ilat. Nīpahrienən, in tatən-iəhau ilat.

tatos nat kit rəhatəmat e nolən eko-eko, o tatiləs-ipər atip in, o tatem-pən niġanəmtitəmat. ²¹ !lataulis məmə nətəliġən rəhatimat təpou pik məmə esotolən nolən rat min əh!

Rəhak nəġhatən in talməl, mətə nolən naka itəm netəm əh kotəmə okotəġhat ausit ron, io min, ekəġhat ausit ron. ²² ?Tahro? ?ilat koatən məmə ilat netəm Hipru? Io min. ?Koatən məmə ilat netəm Isrel? Io min. ?Koatən məmə ilat noanol rəha Epraham? Io min. ²³ ?Koatən məmə ilat iolwək min rəha Kristo? Io min, mətə ekaprəkis-in ilat. Kəsi, iatəġhat tahmen e ialməl kit. Emol wək pik taprəkis-in ilat, kən kiləs-ipən io e kalapus nian tepət taprəkis-in ilat, kən kəmalis io taprəkis-in ilat, kən iuəhkir ekimis nian tepət. ²⁴ Nian faif, noanol rəha Isrel kəmotalis io mau tate-nain. ²⁵ Nian kišil, kəmalis io e nikilkil. Nian kit kəmaht io e kəpiel apin. Nian kišil emuwın e nego kən nego tamnim, kən nian kit emeai əpəh itəhəi lokamnim o nian apiəpiə kit, lapin ne nərauiəġən. ²⁶ Nian rafin etaliwək o nolən wək rəhak. Kən iuəhkir naruə asol tiləs io ekimis, kən emətatiġ ikin tasilə ikin imaa iakləh min, kən ikin tasilə ikin imaa natimak min noanol rəha Isrel, kən ikin tasilə ikin imaa Iaihlua min, kən ikin tasilə ikin e taon asol, kən ikin tasilə ikin e ikin taruən-aruən ikin, kən ikin tasilə ikin əpəh itəhəi, kən ikin tasilə ikin imaa piak eiueiuə min. ²⁷ Emol pik wək, kən nian tepət esapilən lapin. Nian min neen, nəumis tus io, kən mətəoaoa, kən nian tepət nigak nagwənən tikə. Kən nian tepət iatətəp, kən rəhak natimnat təsahmenən o nətəpən. ²⁸ Kən taprəkis-in natimnat min əh, nian rafin nikik təht pik niməfak min rafin. ²⁹ Okəmə suah kit rəhan nəmegəhən teiuaiu, kən io min, rəhak nəmegəhən teiuaiu. Okəmə suah kit tatit suah kit min e təfagə rat, kən

11:22: Fil 3:5 11:23: Wək 16:23 11:24: Dut 25:3 11:25: Wək 16:22; 14:19
 11:26: Wək 9:23; 14:5

nikik titahmæ pik ron.

³⁰ Okæmæ ekæike mæghat ausit, kæn ekæghat ausit o nat itæm tatæghatun mæmæ ræhak næsanænæn tikæ. ³¹ Kæn Uhgîn, u in Uhgîn ne Tata ræha Iæræmæra Iesu, itæm katilæs-ipær nærgîn nian min rafin namnun tikæ, titun mæmæ io, eseiuan. ³² Æpæh Tamaskes, etæm-iasol ræha Kig Aretas tæmælin ræhan mopael min o nehm wiræn nafilua ræha taon mæmæ okotegæs-in motaskælim motilæs-ipæn io e kalapus. ³³ Mæto kæmilæs-ipæn io e kætîm asol kit, kætupæn nol lan, kilæs-ipæn e winta e fenis asol kæmol e kæpiel, kæn kæhlman-æhlman tuwin æpæh læhau, kæn inæh suatip emagim lan.

12

Nihlîn kit ne nat kit tahmen e napilaiiræn

¹ Ekæike matæghat ausit, nat ærnapin tæsolæn win e nat kit ikin, mæto ekækæike matæn natimnat min tahmen e napilaiiræn ne næghatæn wi min itæm Iæræmæra tæmol æp kæm io. ² Ekitun iæfak kit itæm tætatætætæ e Kristo.* E nup fotin tinuwin rækis, Uhgîn tæmilæs muwin æpæh ilis e nego e neai.† Iækæruu okæmæ nipætîn tinatuwin, o narmin æm, Uhgîn æm titun. ³ Kæn ekæn min mæmæ iækæruu okæmæ nipætîn tinatuwin, o narmin æm, Uhgîn æm titun. Mæto ekitun mæmæ suah æh, ⁴ Uhgîn tæmilæs muwin æpæh iman ikin.‡ Kæn in tæmæto nat anion min itæm tæsetuatipæn mæmæ etæmim ræha nætueintæn otæn. ⁵ Ekæghat ausit o

11:33: Wæk 9:23-25 * 12:2: Pol tatæghat-in atip. † 12:2: Næghatæn Kris ætuatip tatæn mæmæ, “neai tatol kisil lan.” Mæto nipætîn tatæn mæmæ “nego e neai u in ikin ræha Uhgîn.” ‡ 12:4: Næghatæn Kris ætuatip tatæn mæmæ, “Paradaes” itæm nipætîn tatæn mæmæ “nego e neai,” ikin itæm netæmim itæm kotætuatip koatuwin ikin nian okotimis.

etəm tol nəhlan, məto esəghat ausit atipən ron io, məto ekəghat ausit əm o rəhak nolən min itəm nəsanənən tikə elat. ⁶ Məto okəmə ekən məmə ekəghat ausit, okol esalmələn, məto-inu ekəghat-in nīpahrienən. Məto esəghat ausitən nəhlan, kən tol nəhlan, suah kit tikə itəm otiləs-ipər io ilis taprəkis nat itəm tətuatip. Iakolkeike məmə otəplan ahmen io e nat naka itəm ekən, o ekol.

⁷ Uhgın təsolkeikeən məmə etausit o nəghatən wi min itəm in təmol əp kəm io, kən nəghatən min əh kotəwir maprəkis. Kən tol nəhlan təmahl-ipa nəratən kəm io tahmen e nihlin kit tətaru nīpətik. Nəratən əh in iahləpis rəha Setan məmə tol nahməən e nīpətik, kən tol nəhlan esausitən. ⁸ Emuəh niki ləramərə mau kisil məmə otiləs-irəkis ron io. ⁹ Məto tən kəm io məmə, “Rəhak nəwirən asol titun naskəlīmən ik, məto-inu nian rəham nəsanənən tikə, nəsanənən rəhak titun nuwamən mol iahgin e rəham nəmegəhən.” Tol nəhlan, etagien pik məmə ekəghat ausit e rəhak nəmegəhən itəm nəsanənən tikə, məmə nəsanənən rəha Kristo otatig e nəmegəhən rəhak. ¹⁰ O nat əh, etagien nian nəsanənən tikə e nīpətik, kən etagien nian katən rat io, kən etagien e nian iəkis min, kən etagien nian katol nəratən kəm io, kən etagien e nian itəm tiəkis ron io. Etagien elat rafin o nərgi Kristo, məto-inu nian rəhak nəsanənən tikə, kən iatəsanən.

¹¹ Emol nolən rəha ialmə, məto itəmat əm nəmoatəkəike kəm io məmə ekol. Nəməsotiləs-ipərən nərgək, məto təpəwir pik okəmə nəmotol mihin, məto-inu io sənəmə ləhau e “aposol min ilis pik” e nat kit əkəku əm, nat əpnəpən io etəm əpnəpən əm. ¹² Nian emətan kitat min itəmat, ematol natimnat itəm tatəgətun io məmə io aposol pahrien kit. Ematol nəmtətin min, ne nat asol min itəm tol narmi netəmim tatiwig, ne nat pispis min e

nikitəmat, kən emol e nətəligən rəhak kaifəməh. ¹³ Nat kitiaħ əm eməsolən e nikitəmat, eməsətapəh-inən məni kit otəmat. !Otaluin o təfagə rat u rəhak![§]

¹⁴ Roiu iatətul matip məmə ekimnə muag itəmat itəm otol kisil lan. Kən ekəsətapəh-inən məni kit otəmat, məto-inu esotolkeikeən rəhatəmat nautə, məto iakolkeike əm itəmat. Otətəlig-in-tu. Sənəmə wək rəha suakəku məmə otehm wir rəhan tata ne mama. Məto in wək rəha tata ne mama məmə okuehm wir rəhalau suakəku. ¹⁵ Tol nəhlan, nīkik tagien məmə ekos-ipinə rafin rəhak natimnat otəmat, kən mos-ipən min rəhak nəmegəhən otəmat. Rəhak nolkeikeən otəmat in tərət, məto rəhatəmat ron io in təkəku əm. !Inu təsətuatipən! ¹⁶ Pəs kotən məmə esətapəh-inən məni kit otəmat. Məto itəmat neen koatən məmə emos natimnat otəmat e nolən eko-eko. ¹⁷ ?Təhro? ?Io emos natimnat e nolən eko-eko nian emahl-ipən netənim kəm itəmat, o kəp? !Kəp! ¹⁸ Emuəh niki Taetas məmə otuwīn otəmat, kən mahl-ipən piətət kit ilau min. ?Taetas təsosən natimnat otəmat e nolən eko-eko, o kəp? ?Nəkotitun o kəp məmə, rəhatimlau nətəligən kitiaħ əm, kən matioal nolən kitiaħ əm?

¹⁹ Kəm-naka nikitəmat təht məmə e nəghatən min rafin əh, emotuhalpin nəghatən kəm itəmat itəm suah kit təmən otimat. Kəp. E niganəmti Uhgīn, emoatəghat tahmen e netəm rəha Kristo. Kən iolīk min, natimnat rafin itəm koatol, koatol məmə itəmat nakotəsanən. ²⁰ Iatən nəhlan məto-inu iatəgīn məmə nian ekimnə, kəm-naka ekəplan məmə nəsolən məmə inu iakolkeike mihin. Kən itəmat min nəkotəplan məmə io esolən məmə inu nakotolkeike mihin. Iatəgīn məmə ekəplan itəmat neen kotərgəhəu, neen koatetet, neen koatəmərīt e neməha, neen kotəhap-əhap ilat min, neen koatən rat netənim,

12:12: Rom 15:19 § 12:13: Pol tatol mīlə elat e nəghatən u.
12:13: 2 Kor 11:9 12:18: 2 Kor 8:6,16-18

neen koatən nīkalīn netəmim, neen koatausit, neen koatol əpnapīn nat. ²¹ Iatəgīn məmə nian ekimnə min, rəhak Uhgīn otīlās-iəhau io e nīganəmtitəmat, kən nīkik otitəgīt kən ekasək otəmat neen itəm nəmotol nolən rat aupən, kən məsotəuhlinən ilat o nolən rat min rəhalat itəm koatol nian rafin, inu koatol nolən rat itəm tol naulisən o nənən, kən nəman ne nīpītan koatan anion, kən koatol nəhlan əpnapīn əm.

13

Namnun nəghatən rəha Pol o nəhgaiirən elat

¹ Inu rəhak naliwəkən itəm tatol kīsil lan otəmat. Naoa Rəha Uhgīn tatən məmə, “Nian suah kit tatətu-pən nəghatən e suah kit min, etəmim kəiu o kīsil okotəkəike motən nəghatən kitiəh, kən tol nəhlan netəmim kotitun məmə nəghatən koatətu-pən lan, in nīpahrienən.”*

² Nian emimnə otəmat itəm tatol kəiu lan, emən-iarəp rəkis nəghatən o nəhgaiirən e netəm koatol təfagə rat ne itəmat rafin, məmə okotapəs təfagə rat min. Kən roiu ekən min nian io əpəh isəu. Nian ekimnə min, ekol nalpīnən kəm ilat itəm kəsotapəsən təfagə rat. ³ Ekotol nəhlan məto-inu nīkitəmat təht məmə rəhak nəsanənən tikə, kən itəmat kotolkeike motitun əsas məmə nian iatəghat, in nəghatən rəha Kristo əm. In təsəpouən o nolən wək itəmat min, məto rəhan nəsanənən tepət e nīkitəmat. ⁴ Nīpahrienən, nian kəmətu-pər e nig kəluau, rəhan nəsanənən tikə e nīpətīn. Məto tatəmegəh roiu e nəsanənən rəha Uhgīn. Kən e nolən kitiəh, rəhatimat nəsanənən tikə e nīpətītimat, məto itimat ekotəmegəh

12:21: 2 Kor 13:2 * 13:1: Dut 19:15 Kəm-naka, Pol tatən məmə rəhan naliwəkən kīsil tahmen e nəghatən rəha netəmim kəiu o kīsil. 13:1: Dut 19:15; Mat 18:16; 1 Tim 5:19

itimat Kristo e nēsanēnēn rēha Uhgīn, kēn nian ekotāghat kēm itēmat, onēkotēplan nēsanēnēn əh.

⁵ Itēmat atip, otakil wir nēmegəhēn rēhatēmat mēmə rēhatēmat nahatētēn in pahrien, o kəp. Itēmat atip, nakotehm wir rēhatēmat nolēn. ? Nəkotitun o kəp, mēmə Kristo Iesu tətatig e nēmegəhēn rēhatēmat? ! Məto okēmə rēhatēmat nēmegəhēn tēsətəu-pənēn nolēn rēha nahatētēn, kēn Kristo tēsatigēn e nēmegəhēn rēhatēmat! ⁶ Kēn emələhəu-pən əskasik rəhak nətəlīgēn mēmə onēkotēplan mēmə itimat aposol min pahrien. ⁷ Kēn roiu, ekoatəfak kēm Uhgīn mēmə itēmat kit tēsolēn nat kit tərət. Esotolkeikeēn nəhlan mēmə otəgətun mēmə rēhatimat wək e nikitēmat in təwir mətuatip. Məto ekotolkeike mēmə itēmat nəkoatol nolēn itəm tətuatip, nat əpnarīn netənim neen koatēn mēmə wək rēhatimat tərət. ⁸ Tol nəhlan məto-inu okol itimat esotolēn nat kit itəm tahtosig-in nīpahrienēn, məto ekotitun nolēn əm nat itəm tatiləs-ipər nīpahrienēn. ⁹ Nikitimat tagien nian itimat ekotitun nolēn u, itəm nēsanēnēn tikə lan, məto nēmegəhēn rēhatēmat tatətul əskasik. Kēn nəfakēn rēhatimat otēmat mēmə nēmegəhēn rēhatēmat tahmen o nətəu-pənēn suatip ətuatip. ¹⁰ Nian io əpəh isəu otēmat, ekəte nəhlan o nat kit. Iərəmərə tinos-ipa rəkis nepətēn kēm io, məto esolkeikeēn mēmə nian ekimnə otēmat, ekəike mol əskasik etēmat e nepətēn əh. In təmos-ipa nepətēn əh mēmə ekiləs-ipər itēmat, sənəmə mēmə ekərəkīn itēmat.

Namnun nəghatən

¹¹ Piak min ne winik min. Inu rəhak namnun nəghatən. Otagien. Otəuhlin rēhatēmat nolēn min. Otəto rəhak nəghatən. Otuwa e nətəlīgēn kitīəh. Otatig e nəməlinuən.

Kən Uhgın rəha nolkeikeən ne nəməlinuən otatig itəmat min.

¹² Otən təwir kəm itəmat min təhmen məmə itəmat kitiaḥ əm e Kristo. ¹³ İəfak min rafin koatən-ipinə təwir kəm itəmat.

¹⁴ Pəs İərəmərə İesu Kristo otawte-in rəhan nəwirən kəm itəmat rafin. Kən pəs Uhgın otos-ipən rəhan nolkeikeən kəm itəmat rafin. Kən pəs Narmin Rəha Uhgın otol nikitəmat rafin tol kitiaḥ.

North Tanna New Testament

The New Testament in the North Tanna Language of Vanuatu
Le Nouveau Testament dans la langue du Nord Tanna de Vanuatu
copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 14 Jun 2022 from source files dated 13 Jun 2022

46e9a2b5-26b8-5301-a079-623f3a20ef8b